

SUNS EUROPE: IL GNÛF PROJÛT DE ARLEF AL FÂS IL PLEN DI RICOGNOSSIMENTS EUROPEANS

Jenfri chescj, il patrocini dal Segretariât gjenerâl dal Consei di Europe. Il Festival si davuelzarà a Udin dai 25 di Novembar ai 11 di Dicembar

Ae fin dal an il Friûl al sarà di gnûf il cûr de Europe multilengâl in graciis di **Suns Europe**, il Festival european des arts performativis in lenghe minoritarie. Di fat, dai **25 di Novembar fin ai 11 di Dicembar**, la nestre region e deventarà la **vetrine des miôr produziions cinematografichis, leterariis e musicâls tes lenghis mancul pandudis de Europe**.

Un projet ambiziôs, che al à za ricevût diviers ricognossiments europeans. Il plui impuartant al è dal sigûr il **patrocini dal Segretariât gjenerâl dal Consei di Europe**, che al considerât i obietîfs di **Suns Europe** e la idee di fonde dal Festival in linie cui siei principis. Chest prestigjôs ricognossiment si zonte a **une altre atestazion internazionâl: la etichete EFFE (Europe for Festivals, Festivals for Europe)**, che la *European Festivals Association* e assegne aes manifestaziions che si distinguin pe cualitât artistiche dal program e pal lôr impat significatîf a nivel locâl, nazonâl e internazionâl.

L'apontament con **Suns Europe** si vierzarà cu la *Mostre dal Cine* (dai 25 ai 28 di Novembar) che si davuelzarà, daûr de tradizion, alî dal cine Visionario di Udin: une panoramiche su lis produziions audiovisivis plui resintis tes lenghis minoritariis europeans. Si larà indevant, po daspò, cui apontaments leteraris di *Peraulis di Suns* (dai 4 ai 6 di Dicembar), tes localitâts di Udin, Cormons e San Vît dal Tiliment che a ospitaran reading, conferencis e incuintris dulà che i protagoniscj a saran scritôrs e poetis che a àn decidût di scrivi te lôr lenghe mari. E in conclusion, il grant finâl di **Suns Europe**: ai 11 di Dicembar a Udin, sul palc dal Teatri Gnûf "Giovanni da Udine", si sfidaran artiscj e grups che a rivaran di ogni bande de Europe. Une "bataie" a ritmi di musiche che e premiarà lis dôs propuestis miôr, e e darà ancje al public la pussibilitât di votâ la band preferide.

Suns Europe al è un projet sostignût de ARLeF e TurismoFVG, cu la colaborazion di Comun di Udin, Fondazione Teatri Gnûf "Giovanni da Udine", Informazion Furlane Soc. Coop., Centri Espression Cinematografichis, Bottega Errante, Il Laboratorio e Font Audiovisîf FVG.

Chi di cualchi zornade, il program in detai dal Festival sarà online su: www.sunseurope.com

Udin, ai 8 di Otubar dal 2015

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<